

80
Rom



1. Gracovites f. G. Johan / gottes vorfifungen
von Christo aus Moſe und allen propheeten
Lübeck 1550 f. 4
2. — von Job und der Naamen Jesu Christo
Lübeck 1550.
constat 16~~7~~
3. — von der Sündfluff.
Lübeck 1549.
4. — von Zwillingen im Bibe
Rebecca, Lübeck, 1550
5. — von dem Silah Jesu Christo
Lübeck 1549.
6. — Das ist Man, Lübeck
1550.
7. — von dem selb d. C. Lübeck
1550
8. — von dem Alkan unfrucht
Gott d. Lübeck, 1550.
9. — von dem vrien Brandopffer.
Lübeck. 1550.
10. — vom Dyriß offer, Lübeck
1550!

Von Heilbrunnen

IESV CHRISTI

DOCTOR IOANNES
DRACONITES.

Isa. XII.

Ir werden mit freuden wasser schepffen:
Aus den Heilbrunnen.



Den Erbarren vnd Weisen:

Georg Padel Bürgermeister Rat

Gemeine der Stad Rigen:

Frid durch CHX Istum.

Wenn mich jemand fragete/wie/was/
warumb ich lerete/predigete/schriebe/ vnd wer mit
die macht gegeben hette: so wolt ich antwortten vnd
sagen/ Gott der heilig Geist hat in disem Capitel geweißaget/ befo-
hen/ fürgeschrieben/ wie/was/ warumb die Christen leren/predigen/
schreiben sollen vnd hat inen macht verheissen söchs zuthun. Ich

aber bin vnter allen Christen auch einer in CHX ISTO dem Gott alles in disem Capitel eben so wol als allen Christen geweißaget befolhen fürgeschrieben verheissen hat. Drumb wil ich mit disem Capitel mein leren/predigen/schreiben/als Göttlich/Christlich/nützlich/wetter vnd so verantwortten vnd beschirmen. Gott Weißaget hie das die Christen im Newen Testament iren glawben bekennen vnd nicht schweigen werden: denn so spricht er/ Ir werdet zur selben zeit sagen. Er gepeut auch das sie CHX ISTO mit leren vnd schreiben singen vnd sagen aller welt bekand machen sollen: denn so spricht er/ Danket/ prediget/ machkund vnter den völkern/ verkündiget/ lobsinget/ jauchet ze du Einwonerin Zion/ es werde kund in allen Landen. Er schreibet auch den Christen für was vnd wouon sie reden sollen mit disen wortten: Den Herrn/seinen namen/ sein thun/ wie sein name so hoch ist. Er zeiget auch vrsach an/warumb er söliche weisung/ gebot/ fürschriff thue/ vnd erzelet Göttliche wolthatten für welche man danken sol mit disen wortten: Denn du bist zornig gewest vber mich vnd dein zorn hat sich gewendet vnd tröstest mich: Sibe Gott ist mein heil/ich bin sicher vnd fürchte mich nicht: Denn Gott der Herr ist mein sterke/ mein psalm/mein zeil: er hat sich heilich bewiesen/ der heilig Israels ist groß bei dir. Er verheist auch zu dem allem eine macht auszurichten/nemlich den heiligen geist in der Tauffe mit disen wortten: Ir werdet mit freuden wasser schepffen aus den heilbrunnen. Sehet lieben Herrn vnd freunde: wer dise weisung sagung lögenstrafft mit stilleschweigen: wer dis Gebot verachtet durch vngheorsam: wer dise fürschriff muttwillens nicht annemen wil/ sondern lallet von menschen leren den Gott feind ist: wer sich Gottes wolthatten nicht bewegen lest disem Capitel zusolgen/sondern ist vndankbar/ wie iener der sein pfund vergrube Matth. 25. braucht auch nicht des heiligen Geists in der Tauffe gegeben CHX ISTO zuehren vnd seiner Christenheit zu nucz: Den mag wol alle welt nicht für einen Christen halten der bey Gott im Himmel ewigleben werde / sondern für einen meinedigen widerchristen / der in der Tauffe geschworen hat der heiligen Dreheit nach disem Capitel zuthun/ vnd alles das wider CHX ISTO ist zulassen/ aber er denckt redet thut nicht nach einem Buchstaben oder tittel dises Capitel ja er verfolget noch dazu alle die so nach disem Christpsalm leren vnd schreiben. Ein sölicher hals wil ich nicht erfunden werden/sondern wie Assaph spricht/ Ps. 84. Ich wil lieber der thür hüten in meines Gottes hause/ denn lang wonen in der gottlosen hütten. Drumb wil ich auch beide mit disem mund vnd mit diser hand (nach der Weisung Esa. 44.) bekennen/das ich vmb nichts anders willen predige/ lere/schreibe/von CHX ISTO meines herzen einige freud/denn das mirs Gott der heilig geist in disem Capitel eben so wol befolhen hat als andern Predigern vnd Christen / vnd durch mich alles gutte wirckt/ also das ich on in nichts bin noch sein wil/ auch mir nichts zuschreiben vnd in alles. Welchem sampt dem Vatter vnd Sone seie lob ehre dank in ewigkeit: AMEN.

Disen nucz vnd brauch dises kleinen Capitel aber grossen Schaces Jesala/ wolt ich ewer Weisheit vnd Gottseligkeit darumb senden / das ich auch euch dafür halt/das ir nach des heiligen geists willen in disem Capitel ausgedruckt gesinnet seit vnd lebet. Söchs von euch zuschreiben/beweget mich nicht wenig der geleret vnd holdselig man Georg Padel: welchem vnd euch allen in CHX ISTO/ bin ich darumb geneiget alles das ich in CHX ISTO guttes vermag zuzeigen / das ir ewre prediger lieber vnd Gottes wortt das sie leren/ dafür halt / als seie es ewer ewigleben: als es denn warhafftig ist/ Wie CHX ISTOVS Jo. 8. zeuget vnd spricht/ Warlich ich sage euch/ So jemand meine wortt wirt halten/ der wird den tod nicht sehen ewiglich.
Geschrieben in der Webe S. Jacobs. 10. Mart. M. D. L.

Von den Heilbrunnen: IESV CHRISTI:

Das XII. Capitel Jesaia.

Dies Capitel Weissaget vom Seligen Reich vnsers Herrn IESV CHRISTI nemlich wie der Heilig Geist durch die tauffe gegeben/im neuen Testament predigen werde. Denn das er mit den Heilbrunnen auff den Heiligen Geist vnd die Tauffe deutete: zeugen/erstlich CHXIST

TVS Jo. 7. Darnach Paulus Tit. 2. So last vns das Capitel in dreie stücke teilen vnd reden: Im ersten/ wie Gott das neue Testament nemlich das Euangelische Predig Ampt stiftet: Im andern/ Wie der Heilig Geist durch die tauffe gegeben werden sol: Im dritten / Wie die predigen werden so den Heiligen Geist empfassen.

In derselben zeit wirstu sagen.

Ich dancke dir Herr / das du zornig bist gewesen vber mich / vnd dein zorn sich gewendet hat / vnd tröstest mich.

Lobe Gott ist mein heil: ich bin sicher / vnd fürchte mich nicht: denn Gott der Herr ist mein sterck / vnd mein Psalm / vnd ist mein heil worden.

In diesem ersten teil last vns hören.

Wie Gott das Neue Testament stiftet.

Senn gleich wie sagen/ heist/ predigen/ das man durch den glawen oben an CHXISTVM vom fluch des gesetzes erlöst werde. Als so heist/ Dieselbige zeit/ des Neuen Testaments zeit: dauon Jer. 31. Ich wil einen neuen bund machen nach diser zeit. So wil er mit disen wortten (Zu derselben zeit wird man sagen) des gesetzes Mo si Ceremonien auffheben/ vnd das Euangelion CHXISTVM einsetzen: wie Deut. XVIII. Mose selbs von sich zu CHXISTVM weiset vnd spricht Deut. 18. Den solt jr hören.

Im Herrn dancken/ heist/ das Euangelion predigen/ nemlich/ das durch Gott für alle wolthaten erzeiget in CHXISTVM preisen/ das die zuhörer bekeret zu CHXISTVM Gott desgleichen dancken lernen. Gottes wolthaten sind reichlich Ps. 103. vnd 118. vnd im Neuen Testament erzelet.

a ij

Die

Von den Heilbrunnen:

Nit diesen wortten (Ich danck dir Herr das du zornig bist gewesen vber mich / vnd dein zorn sich gewendet hat vnd tröstest mich) begreiffet Jesaia nicht alleine alle Gottes wolthaten erzeiget in **CHXJSTO** / sondern auch das ganze Gesez vnd Euangelion. **D**enn was ist anders gesagt / den Herrn zornig gewest sein / denn das gesez einen zuchtmeister sein auff **CHXJSTO**: Trösten aber heist / durchs Euangelion den Heiligen geist geben / welcher gerecht macht durch den glauben vnd in aller not tröstet vnd ewig lebend macht. Jo. 16. Ich wil euch den tröster senden. So wil er mit diesen wortten (ich danck dir Gott das du zornig bist gewest vber mich / vnd dein zorn sich gewendet hat vnd tröstest mich) nicht alleine weis sagen / das man im Newen Testament Bus vnd vergebung der sünden predigen werde. Lu. 24. Sondern auch das der Heilig Geist durchs Euangelion gegeben werden sol / der alle die so durchs gesez tod sind / durchs Euangelion lebendig macht z. Cor. 3. Dumb was **CHXJSTO** im newen Testament geleret / den Aposteln zu leren befolhen / vnd wir auch leren / das hat Jesaias hie zuuor geweissaget. **Lu**

Wie die Christen Gottes wortte bekennen / vnd mit dem wortte sich wider alles vnglück trösten / werden.

Denn was wil er anders mit diesen wortten (Sihet Gott ist mein Heil: Ich bin sicher vnd fürchte mich nicht: Denn Gott der Herr ist mein sterck vnd mein Psalm vnd ist mein Heil worden) denn mit anzeigung der ursache warumb man Gott danken sol / nicht alleine widerholen wie man das Euangelion predigen sol / sondern auch weiter erzelen alles gutte so die Christen aus dem Euangelio schepffen mügen:

Sich mein Heil sein / heist / **CHXJSTO** darumb leben vnd regiren / das er mich von sünd vnd tod ewiglich erlöse: Wie David Ps. 68. auch spricht / Wir haben einen Gott der hilfft / vnd einen Herrn der vom tod errettet. So wil er mit diesen wortten (Gott ist mein heil) alle Christen leren / das sie **CHXJSTO** alleine für ire gerechtigkeit heiligkeit weisheit erlösung halten vnd erlösen sollen: Wie Paulus 1. Cor. 1.

Sicher sein / heist / durch den glauben an **CHXJSTO** frid mit Gott haben / nemlich solch ein gutt gewissen / als David Ps. 4. da er spricht / ich lige vnd schlaffe ganz mit friden / denn du Herr alleine machst das ich sicher wone. Daraus zuuernemen / das sich nicht fürchten / heisse / die Christglewbigen so ein vnerschrocken hertz für allen teuffeln haben / als David Ps. 112. nemlich durch den Heiligen Geist / aller Christen hertz vnd gewissen / nicht alleine mit allen Gottes zusagungen von **CHXJSTO** / wider alle flüche des gesezes / getröstet werden / sondern auch des versichert werden / das sie durch den blossen glauben an **CHXJSTO** gerecht für Gott seien /

Jesu Christi.

seien/ vnd ewiglich bei Gott im Himmel leben werden: als Paulus auch vom heiligen Geist zeuget Ro. 8. da er spricht. Der Geist versichert vnsern Geist das wir Gottes Kinder seien: Denn wir haben nicht einen knechtlichen Geist empfangen/ das wir vns abermal fürchten solten/ sondern einen kindlichen Geist/ der da schreiet / Abba lieber Vater. **H**ieraus ist offenbar das alle trawickeit vom Teuffel oder fleisch vnd blut ist: Weil **CHRISTVS** spricht Jo. 16. Seit getrost/ ich habe die Welt überwunden. Aber dis ist ein Euangelisch vnd geistlich ercznei wider alle schreckniß des Herzen vnd gewissens. Was für woffen brauchen alle Christen wider eusserliche feinde: **Jesai**as spricht hie.

Der Herr ist mein sterke: Was ist das gesagt? Wie **David** Psal. 3. sprach im elend / der Herr ist mein schild für mich. Also werden alle Christen im Creucz sagen / wie Paulus Ro. VIII. Ist Gott für vns/ wer mag wider vns sein? **D**arumb wil er mit diesen wortten (Gott der Herr ist mein sterke) leren / das die Christen wider alle Sünd vnd feinde/ sich Gottes in **CHRISTO** rühmen vnd sagen **Jesa.** 45. Im Herrn hab ich gerechtikeit vnd sterke.

Was ist aber gesagt: der Herr ist mein psalm? Alles was die Christen predigen vnd schreiben/ das gebe **CHRISTVS** alleis ne die ehre: Wie Psal. 118. Der Herr ist mein macht mein psalm mein heil. **D**er Herr aber mein heil sein / heist / die Hellschen pfortten wider meinen Heiland **CHRISTVM** in mir vnd wider mich durch in nichts vermügen können: wie **CHRISTVS** **Matth.** 16. zeuget vnd spricht/ Die Hellschen pfortten sollen nichts vermügen wider disen fels.

Siehe dise grosse wolthaten Gottes werden allen gleybigen durchs Euangelion geschenckt/ auch der Heilig Geist: wie folget.

Ir werdet mit freuden Wasser schepffen/ aus den Heil Brunnen.

Aus diesem andern teil last vns schlechthin lernen

Wie der Heilig Geist durch die Tauffe gegeben werden sol.

Siehe die Heil Brunnen/ verstehe das Euangelion vnd die tauffe: Darumb Heil Brunnen genennet/ das **CHRISTVS** durchs Euangelion vnd die Tauffe den Heiligen Geist/ der Christenheit Heilmacher/ schenckt: wie die schrift beide vom Euangelio vnd der Tauffe zeuget. **Jo.** 9. spricht **CHRISTVS**. Wer mir gleybet (als die schrift saget) von des leibe werden fließen lebendige wasser. **Paulus** spricht **Ti.** 3. Er hat reichlich vber vns aussgegoss

Von den Heilbrunnen :

gegossen den Heiligen Geist durchs bad der Wiedergeburt. So wera
wasserschepffen aus den Heilbrunnen nichts anders/denn alle glew-
bigen des Heiligen Geists gaben durchs Euangelion vnd die tauffe
entpfahen. Drumb wie Paulus Eph. 4. vnd 1. Cor. 12. ia das
ganze Neue Testament vom Heiligen geist predigen/dauon weiffa-
get hie Jesaia / das es durch Gottes mittel/ nemlich durchs Euan-
gelion vnd die tauffe CHX JST J sol entpfangen werden.

Nad werdet sagen zu derselbigen zeit.
Dancket dem Herrn: Prediget seinen
Namen: Macht kund vnter den völk-
ern sein thun: Verkündiget wie sein na-
me so hoch ist.

Lobet den Herrn/ denn er hat sich herlich
beweiset: solches seie kund in allen Lan-
den.

Jauchze vnd rhüme/ du einwonerin zu Je-
ron: denn der heilige Israels ist gros bei
dir.

Aus diesem letzten teil last vns auch schlechthin lernen

Wie die so den Heiligen Geist haben
Predigen werden.

Denn was wil er anders mit disen wortten (Vnd werden sa-
gen zu derselben zeit: dancket dem Herrn) denn weiffagen/
das die so durchs Euangelion den Heiligen Geist entpfangen/
die gröste sorge darauff legen werden/ das sie CHX JST VNS aller
welt predigen vnd leren Gott für alle wolthatten in CHX JST VNS
erzeiget dancken: Dancken/ sagen/ predigen/ kundmachen/ verk-
ündigen/ lobfingen/ jauchzen/ rhümen/ heist/ denen so mit der Ge-
sespredigt allen Gottes drewortten exempeln Göttlichs zorns im
gewissen bis auff den Tod verwundet sind/ alle verheiffunge Gottes
das Euangelion von CHX JST VNS so frölich vnd eröstlich predi-
gen: als David Ps. 103. vnd 2. Cor. 1. Paulus spricht/ Alle Gottes
verheiffunge sind amen vnd ja in CHX JST VNS. Was man aber
predigen sol/ scheint aus disen wortten (Den Herrn/ seinen namen/ sein
thun/ seinen hohen namen) wil sagen/ alles was vns Gott in CHX
JST VNS guttes verheiffen / vnd CHX JST VNS vns geprediget
vnd erworben hat/ dauon sol man in allen gemeinen fingen vnd sa-
gen.

Jesu Christo.

gen. Daraus offenbar ist / das ein rechter Prediger des Euangelij
gnug habe an der Heiligen Schrift vmb CHX JSTI willen ge-
setzet auszulegen / vnd gar nichts bedürffe der schendlichen Bauchles-
re die von CHX JSTO führen vnd ewiglich verdammen: Als z.
Pe. z. zeuget vnd spricht / Es werden vnter euch sein falscheleerer die
neben einführen werden verderbliche secten / vnd verleugnen des Herrn
der sie erkauft hat / vnd werden vber sich selbs führen ein schnelles ver-
damnis / vnd viel werden nachfolgen irem verderben.

Wem sol man aber predigen: Den völkern / allen landen / der ein-
woner in zu Zion: das ist der Christenheit in allen landen vnter
allen völkern zustrewet: wie CHX JSTVS JESVS der heil-
lig Israel spricht Mar. Vl. Gehet hin in alle welt vnd prediget das
Euangelion aller Creature. Vnd Da. 12. Die Christenheit eine zu-
strewung des Heiligen volcks nennet.

Warumb man aber predigen sol / zeigen an die wort: Denn er hat
sich herlich beweiset / der Heilig Israel ist groß bei dir: wil das
mit anzeigen / das man den Heiligen Israel JESVS CHX J-
STVS in aller welt darumb predigen sol / das er vns mit seinem
sterben vnd aufferstehen / vom Ewigen verdamnis erlöst vnd das ewi-
ge leben erworben hat. Wie Maria Lu. 1. rühmet vnd spricht / Er
hat grosses an mir gethan / der da mechtig ist vnd des name Heilig
ist. Vnd Paulus z. Ti. 1. Er hat dem tod die macht genomen / vnd
ein vnuergänglich leben an tag bracht durchs Euangelion.

Schluss Rede.

S wil Jesaia mit diesem ganzen Capitel das alt Tes-
tament auffgehoben vnd das Neue gestiftet haben /
nemlich das Euangelische Predigamt: wie es CHX
JSTVS angefangen / die Apostel getrieben / vnd wie
auch teglich CHX JSTVS predigen vnd von im
schreiben: Zu lob vnd ehren der heiligen Dreiheit vnd zu nucz vnd
trost dem Euangelischen Predigamt vnd der trübseligen Chris-
tenheit auff erden.

Geprediget zu Marburg. 1546.
Geschrieben zu Lübeck M. D. L.

Gedruckt durch Ioan Valhorn.

Esa. XII.

Sihe Gott ist mein Heil.



Esa. XII.


Lobset dem Herrn : denn er hat
sich herlich beweiset.

88 153

AB 88 153

X 199 7507

3



... Jesu Christo.
... er den Gottfürchtigen vnd Chri...

Von Heilbrunnen

IESV CHRISTI

DOCTOR IOANNES DRACONITES.

Isa. XII.

**Ihr werdet mit freuden wasser scheyffen :
Aus den Heilbrunnen.**

